

陶文毅公全集

陶文毅公全集卷十五目錄

奏疏 鹽法

陳奏回空糧船未便任帶蘆鹽摺子

再陳回空糧船未便任帶蘆鹽摺子

再陳糧私最爲淮綱之害現在緝私緊要附片

再陳回空糧船未便任帶蘆鹽附片

會同浙閩督撫暨蘇撫籌議堵截淮私章程以衛

浙鹽摺子

仍請停止加帶已庚殘引摺子

查覆楚西現賣鹽價摺子

覆奏淮鹽奏銷難復原限摺子

浙江借買淮北票鹽一萬引附片

停借淮北商人底馬摺子

趕辦壬癸未運引數緩開甲午新引附片

陳明淮北鹽少販多情形附片

奏疏 鹽法

陳奏回空糧船未便任帶蘆鹽摺子

奏爲沿途查緝漕船夾私正以速趲回空未便任帶

蘆鹽致使鹽漕兩誤據實縷陳仰祈

聖鑒事竊

臣

於九月初十日接漕

臣

貴慶來咨以沿途

派委漕弁梭查回空私鹽有礙通行

奏請將委弁撤回並以江廣道遠運丁苦累於長蘆

官店例買食鹽四十斤之外擬加增買帶過揚州

時納課給照准其帶回售賣俟抵天津面商長蘆

鹽政籌議先附片奏明等因鈔摺咨會前來 臣詳

附錄卷之三
核原奏不但大誤鹽務亦且誤漕轉甚現在鹽務
既爲臣所專管而漕運亦臣所兼理關繫重大不
敢不切實敬陳於

聖主之前查漕船回空帶私爲歷來之痼弊蘆私居十
之八九淮私居十之一二年甚一年竟有銀主隨
幫而行謂之風客除本分利前數年已坐占淮南
數十萬引之綱額人所共知是旣大害於鹽務且
勾引梟匪紛紛聚集販運上船明目張膽肆行無
忌亦有礙於地方而漕船停泊買私尤有誤於漕

運自

臣疊經奏奉

特旨派委文武大員於黃河南北及淮揚等處嚴密迎查並由前任漕臣吳邦慶蘇成額

奏派廉幹漕員劉燦任錫五等會同押空幫弁於直隸山東沿路上私隘口認真堵緝是截之於未經上載之先更勝逐船接起於已帶之後而漕船無可停留卽寓催趲於查緝之中兩年來

功令森嚴在淮旣無顆粒透漏且值前任任長蘆鹽政

臣鍾靈曾任兩淮深知弊累故堵禁蘆私甚嚴使之絕無夾帶回空歸次亦較前迅速卽如道光九年十年間天津沿路並不查鹽回空軍船於十一

月底至十二月始全數出瓜洲江口十一二年沿
路查鹽嚴緊乃於十一月內均已全數出江完竣
並無絲毫阻滯蓋丁舵水手每因帶私勾通風客
與天津之公口岸及沿途兵役暗相約結裝載支
延或船已行而人未去仍於黑夜載送處處稽遲
今因查私甚緊無可希冀卽無可逗遛是以行程
不催自速而糧私既絕官引自銷是以江廣等省
雖連值水災銷數尙稍增於前此實鹽漕兩益之
明證現屆回空之際臣已遴派文武照前認真接
查堵緝屢接沿路委弁來稟頗知實力奉公如果

夾帶毫無再得江廣各省年歲豐登即可冀暢銷如額漸振衰疲至於本年漕船實由地方災歉之後兌運艱難且聞河水大溜高上聞耽延以致重運稍緩時日溯查從前漕運亦往往有此儘可嚴行催趲以速補遲無誤回空初不關按查私鹽之故今空船漸次南下自應恭照前年欽奉諭旨沿途加緊查緝趲行方能迅速若遽請將

奏委之漕弁撤退則幫丁舵水等俱知禁令已弛必至放膽買鹽其停泊上載必不止如委員按查之片刻工夫耽誤轉甚地方文武雖均有緝私之責

孰敢攖漕船之鋒祇冀其安靜過境完事若各關查緝則鹽鹺本不納稅尤難望其認真見有私鹽夾帶不過爲胥役得規賣放之地徒屬具文無補於事而楚西等省之冬春銷市必盡爲糧私所占以兩年來奉

特旨整頓之事隙於一旦從此更難爲力矣明縱透漏既有害於鹺綱欲速反遲尤有誤於漕運此沿途隘口查緝漕弁萬不可撤者也至漕臣附片所陳於例買食鹽四十斤外擬在長蘆加買過揚納課給照准其帶回售賣一事似未將漕運鹽務之全

局及長蘆淮南之科則綱地通盤籌畫也其中格礙甚多攸關重大查漕船往返刻不容緩嚴禁其帶私尙不免停留偷販今准其買鹽納課則是丁而兼商例得停泊上載停泊納課停泊銷售則歸次更無期矣不但有誤回空並且有誤重運况漕船水手素稱桀驁加以順帶官鹽必有梟匪出資附和以

天庾正供之船爲聚集匪黨之藪其害更不可勝言故昔年論事者曾有漕船回空至儀徵裝載商鹽順赴楚西二岸之議終以利不勝害未能舉行夫運

淮南之引鹽赴淮南之岸地尙且有礙若以蘆鹽而納淮課其輕重懸殊以蘆鹽而售淮地必藩籬全破蓋東南財賦淮鹽爲最大天下鹽務淮課爲最重卽如各省地丁錢糧或數十萬或百餘萬極重如江蘇亦祇三百萬而淮鹽內外正雜支款歲需七八百萬已足抵數省之錢糧卽南漕動稱六省亦祇額米四百餘萬所值僅與淮課相準而丁糧行月贈伍津貼各項必須耗費至數十萬百萬始能上達倉儲是鹽漕兩事均爲

國家重計而鹽務似尤未可偏廢也今若買自長蘆

賣於淮地無論收課不足當淮鹽十分之一且長蘆之課爲兩淮所收兩淮之地爲長蘆所占以官事而論長蘆課絀有藉詞兩淮鹽壅無去路以實情而論所銷盡長蘆之私鹽所缺盡兩淮之

國課總計湖廣江西漕船滿載鹽斤可及二三十萬引江廣幫旣准帶鹽安徽幫亦不能禁止不啻占淮南半綱之額雖定以到揚納課而彼滿裝千引報百十引之課將聽其趲行而去則鹽課盡虧將扣留稱掣無論其恃漕爲護不服盤查而一船需數日工夫焉得有如許人手如許時日終歸於鹽

漕兩誤兼之淮南通泰兩屬二十場所產之鹽無從銷售數十萬竈丁生計有妨勢必私鹽四溢梟徒橫起於

國計民生大損漕

臣

以爲援照淮北票鹽而行不知

票販專於販鹽別無關礙官事且淮北錢糧較輕仍以淮北之鹽行銷淮北綱地并不准其越境乃欲援照而以蘆鹽行淮地已屬比擬不倫至於丁情苦累淮帶土宜津貼原有

曠蕩之恩何能再以至重之嵯綱輕爲丁舵沾潤之計

臣不敢爲一己之責遠嫌緘默謹據實

奏懇

天恩敕下直隸總督山東巡撫長蘆鹽政天津鎮總兵
仍照案嚴督沿河營汛州縣查拏梟匪窩囤堵截
私鹽透上漕船並請

諭飭漕臣查照前兩年

奏定成案仍派幹練漕弁於各要隘會同幫弁堵截
按查庶免帶私停留既得迅速南下而楚西綱岸
亦不致於歉歲滯銷之後再受糧私侵占於漕運
鹽務地方均大有裨益爲此恭摺具

奏伏乞

皇上聖鑒訓示謹

奏

道光十三年十月十四日奉到

硃批所議甚是另有旨諭欽此同日奉到道光十三年

九月三十日內閣奉

上諭陶澍奏查緝漕船夾私正以速趨回空未便任帶
蘆鹽致使鹽漕兩誤一摺所議甚是前據貴慶奏籌
議江廣回空軍船酌增食鹽給票交課章程五條朕
卽覺其不可行惟以鹽漕並重不厭精詳當交部議
旋據戶部奏增買蘆鹽有妨淮引降旨令陶澍悉心

妥議茲據該督於未奉諭旨之先接該漕督咨文卽力陳誤鹽亦且誤漕甚爲明晰漕船回空帶私爲歷來之痼弊並有隨幫風客除本分利坐占淮南數十萬引綱額勾引梟匪肆行無忌漕船停泊買私尤有誤於趲運前經陶澍派委文武大員於黃河南北及淮揚等處嚴密迎查并令漕員會同押空幫弁於直隸山東隘口認真堵緝卽寓催趲於查緝之中回空歸次亦較前迅速糧私旣絕官引自銷江廣等省雖連值水災銷數尙增本年漕船實由兌運艱難以致稽緩儘可嚴行催趲以速補運若將漕弁撤退則幫

丁舵水等俱知禁令已弛必致放膽買鹽明縱透漏
既害鹽綱欲速反遲尤誤漕運至該漕督請於例買
食鹽四十斤外請在長蘆加買過揚納課不但有誤
回空并且有誤重運况漕船水手素稱桀驁加以順
帶官鹽必有梟匪出貲附和以天庾正供之船爲聚
集匪黨之藪且所銷盡長蘆之私所缺盡兩淮之課
實爲自壞藩籬至丁情苦累准帶土宜津貼以緩綱
爲丁舵沾潤之計國家亦無此政體著直隸總督山
東巡撫長蘆鹽政天津鎮總兵仍嚴督沿河營汛州
縣查拏梟匪窩囤堵截私鹽透上漕船並著署漕運

總督恩銘仍派幹練漕弁於各要隘會同幫弁堵截
按查其有已經議撤者仍行添設不准帶私停留務
期迅速南下俾楚西綱岸不致於歉歲滯銷之後再
受糧私侵占並著責成陶澍實力整頓以期鹽務日
有起色不致滯銷庶鹽漕均有裨益欽此

再陳回空糧船未便任帶蘆鹽摺子

奏爲遵

旨悉心妥議恭摺覆

奏仰祈

聖鑒事竊臣接准軍機大臣字寄道光十三年九月十

七日奉

上諭前據貴慶奏糧船例帶食鹽買自長蘆官店前因越境有妨淮課是以嚴禁近歲江廣軍船不敢夾帶鹽斤已歷三年旂丁苦累日漸難堪請於江廣回空軍船行抵天津准於例帶食鹽之外酌予增買每百

斤一包購帶四十包船到揚州計包交課給予印票收執放行以長蘆輕課之鹽納淮南之課於正額既有盈無絀揚州收此銀兩卽作爲淮南額課准其抵算亦昭平允並籌議章程五條開單呈覽當經降旨交戶部議奏茲據戶部奏長蘆兩淮各分引地例不准越界銷售鄰省之鹽多占一分本地之鹽卽少銷一分非固守藩籬不足以防侵灌該漕督所奏固爲體卹運丁起見惟以長蘆之鹽交兩淮之課究屬越界行銷長蘆引不加增恐致固販售私之弊兩淮課由外納恐有場鹽壅滯串通舞弊之虞所稱每船帶

鹽不過一艙不及淮南額引百分之一抵次即可獲利回空必更迅速核與陶澍前奏回空運船帶鹽幾及淮引全綱之數沿途逗遛售賣冬杪尙未歸次之語不符近年兩淮奏銷銀數較之庚寅以前多至一百數十萬兩倘因增買蘆鹽有妨淮引將來墮課之員轉得有所藉口惟該漕督所稱旂丁苦累難堪及今不爲調劑則侵蝕正糧拆賣船器皆所不免亦不能不豫爲區畫等語國家鹽漕並重淮綱積年疲敝甫有轉機固不可因調劑旂丁轉致顧此失彼旂丁日形苦累亦應量予變通總之更易章程必須將兩

處情形通盤籌畫方可無虞窒礙兩江總督管理兩淮鹽務江廣漕船過境亦有督飭稽查之責著陶澍屏除意見悉心妥議務期鹽漕兩利方爲妥善貴慶所奏章程五條著鈔給閱看將此諭令知之欽此並將原奏章程五條鈔寄前來伏查回空漕船帶鹽一事前據漕臣貴慶鈔摺咨會臣已將鹽漕關繫重大不但貽誤淮綱抑且誤漕轉甚於

國計民生大損緣由縷悉具

奏在案茲復詳閱所陳章程五條一議天津買鹽揚州納課查定例鹽有產額有引地疆界攸分若越

界行鹽誠如部臣所言長蘆引不加增徒啟國販
售私之弊兩淮課由外約必有場鹽壅滯串通弊
弊之虞况乎藩籬一撤必至鹽法盡墮恐渙散不
止兩淮也一議現課現交並無占礙准綱查淮南
引鹽有正課有雜課又有岸費爲數甚鉅迥非長
蘆可比今若以百不及一之鹽課壞八九百萬之
全綱數既不值而偷漏且多欲逐包稱掣則時日
太促欲就地徵課則鹽未變錢糧船水手恃衆帶
私往往不服按查逞凶釀事况明目張膽以鹽爲
名乎謂無占礙竊所未喻一議回空必速一議無

妨新運查漕船往返不准片刻逗遛因其買私猶有延捱若明准帶鹽則上載納課銷售處處皆須停待官亦不能催迫卽恐歸次愈遲新運安保不誤至稱一船十八艙不過一艙裝鹽果有如此誠謹之丁舵則歷來不致犯禁而載私矣一議蘆鹽價賤買帶方裨丁計是則可知歷來回空之專帶蘆私更可知淮綱成本課額之重矣復何能以極賤之鹽越銷重地使兩淮益受其敝乎計此章程五條無非准帶蘆鹽一語不知糧船從前非不帶蘆鹽也而不聞幫丁之受益獲有餘潤以資辦公

者蓋載鹽並非糧船之利乃私梟風客之利也旂
丁回空貨囊已竭舵工水手身價更微卽購私能
有幾何其所以敢於犯禁滿載私鹽者皆梟徒預
爲布置而風客出本買裝勾串水手啖以餘利仗
爲護符馴致闖關逃稅莫敢誰何其勢足以壞鹽
綱而於漕務實無所濟溯查旂丁辦運本有衛地
屯田又有行糧月糧且造船有費歲修有費有水
次耗米有隨船耗米抵通交卸復給餘米以及贈
貼等項每船銀米各以數百計其所索各州縣兌
費陋規與

陶文毅公全集

卷十五

奏疏

三

恩准免稅之隨帶土宜尙不在此內得項可謂多矣而無歲不以疲累爲詞卽如庚寅以前數年間正糧船盛載蘆私之時淮綱阻遏不行鹽務因之大壞而旂丁並不多沾鹽利仍然刻須調劑曾經前漕臣訥爾經額奏奉

諭旨每船加帶土宜三十石合之原額及嘉慶五年所加共已免稅至二百二十石之多迺不旋踵又思調劑竊恐豁壑難填臣固不敢以至重之淮綱輕爲假借且明知加增於丁舵無益亦不敢另籌調劑之方兼查道光十一年安徽撫臣因禁糧船帶

私請再加土宜三十石經前任漕臣吳邦慶以轉
多流弊

奏寢其議所言舵水身工雜費及挾制需索情形極
爲明切今若因江廣幫船積慣帶私卽議予以調
劑則江浙等幫同一挽運豈能不藉口希冀又將
何以處之夫人心無止足之時積弊有難返之勢
國家綱紀法度具有常經倘以費用不敷事事爲之
請益時時爲之議加不但

帑藏無此經費卽小民亦無如許脂膏在旂丁之得
項已不爲不厚而不免仍形苦累者一則得之較

易不無任意花消一則受兌開行之後直至通倉
交卸無處不受人魚肉以故調劑有加而補救無
效應請

旨敕下漕臣督同糧道通計每年經費量入爲出自淮
迄通確查積弊嚴禁弁委胥役之勒索並懇

諭敕倉場嚴查經紀人等捐勒苛求俾漕務少消耗之
數則旂丁之力自舒不但淮鹽藉免充塞卽弁丁
挑斤米色橫索幫規之風亦可稍戢倘有刁玩之
徒敢於侵蝕正糧拆賣船器卽應執法嚴懲不能
慮有此弊而預爲之詞轉使明知而故犯現在漕

船經過蘆東見漕委盡撤諒必買帶盈船欲掇起
於既帶之後恐不比禁止於未帶之先臣惟有遵
委道將帶同廉幹員弁於入境嚴查沿途堵緝並
於揚州以至蕪湖九江等處實力查拏懲辦以期
弊去則利興仰副

聖主廑念鹽漕之至意所有臣籌議糧船無庸藉鹽調
劑緣由謹據實覆

奏伏乞

皇上聖鑒訓示謹

奏

道光十三年十月二十八日奉到

硃批另有旨欽此同日奉到道光十三年十月十七日

內閣奉

上諭前據貴慶奏籌議江廣回空軍船酌增食鹽給票
交課章程五條調劑旗丁當降旨交陶澍體察情形
悉心妥議該督於接到該漕督咨文卽力陳誤鹽且
致誤漕議駁明晰特降旨令直隸總督等仍嚴飭沿
河營汎州縣查拏梟匪窩囤堵截私鹽透上漕船其
已撤撥查漕弁仍行添設不准帶私停留茲復據陶
澍覆奏旗丁得項不爲不厚揆其苦累之由多緣旗

丁任意銷糜且受兌開行以至通倉交卸均不免受人勒索如果禁絕諸弊漕務少消耗之數則丁力自舒不但淮鹽藉免充塞卽弁丁挑斥米色橫索幫規亦可斂戢倘旂丁中有刁玩之徒敢於侵蝕正糧拆賣船器必當執法嚴懲豈可慮有此弊而豫爲調劑事事請益時時議加不但國家無此政體必致不肖旂丁恃有調劑不知止足是除弊而轉益滋弊現在回空軍船陸續抵入江境該督卽遴委道將帶同廉幹員弁沿途堵緝糧私並於揚州以至蕪湖九江等處實力查拏有犯必懲著漕運總督督同各糧道通

計每年經費量入爲出自淮迄通確查積弊嚴禁弁
委胥役之勒索並著倉場侍郎通飭各倉監督嚴查
經紀人等措勒索求務於弊端淨絕不使旗丁有所
藉口以肅漕政而杜糧私欽此

再陳糧私最爲淮綱之害現在緝私緊要附片
再查糧船夾帶蘆鹽最爲淮綱之害緣江廣軍船
歸次往往歲暮程遙恐誤新漕是以沿途催趲甚
急而夾帶私鹽之舵工水手卽藉此以爲挾制之
端遇有搜查嚴緊大則聚衆拒捕小則棄船逃走
水手星散無人駕挽使查鹽委員怵於誤漕不敢
羈延因而不敢按索比及出江船仍沿路賣鹽任
意逗遛此歷來之通弊所以欲杜蘆私莫若先嚴
於長蘆未載之爲愈也伏查道光十年冬欽奉

諭旨軍船帶私之弊以江廣爲最其透漏鹽斤之弊以

長蘆爲最與其按查於旣帶之後不若嚴禁於未帶
之先等因欽此又於道光十一年夏經臣縷陳長蘆
查鹽七弊奉

旨天津一帶著琦善嚴飭查拏堵截囤販有犯必懲以
杜透漏迨入江南地界著該督派委徐州鎮道嚴密
迎查渡黃後酌派文武員弁照例按查如有夾帶鹽
斤悉行起隊根究風客加等嚴治幫弁旂丁一併參
懲所有水手人等向遇按查嚴緊輒棄船四散以圖
挾制委員恐誤歸次往往敷衍了事遂致肆無忌憚
自應申明條例一船之內丁舵爲主水手有犯責在

旂丁如有逃匿一面嚴拏究懲一面督飭旂丁駕船趕幫受兌不致有誤餘著照所議辦理等因欽此欽遵通飭在案現在天津漕委既撤各船紛紛載鹽無人過問而揚州商人一聞此信頓形觀望竟有挾課請引臨期將銀掣回者似此情形殊於淮綱起跌攸關緝私更應緊要倘或水手輩因梭查而故態復萌敢於星散臣自當遵

旨一面嚴拏一面飭丁另雇水手駕船歸次趕幫受兌倘旂丁不遵卽行嚴懲並將押船之幫弁從嚴參懲以振頽風而肅鹺政合先附片陳明伏乞

聖鑒謹

奏

道光十三年十月二十八日奉到

硃批所奏是實力行之欽此

再陳回空糧船未便任帶蘆鹽附片

再臣於十月二十七日承准軍機處字寄欽奉

上諭據御史許球奏回空軍船請帶蘆鹽久已躍躍欲
試現奉堵截照舊揆查伊等購買之貨均歸烏有利
未獲而轉觸科條全虧貲本兩江總督原以緝私爲
重若一味濟之以猛是貴慶籌議卹丁非徒無益而
又害之殊不足折服幫丁之心江廣軍船人數衆多
萬一鋌而走險另起釁端必致貽誤歸次等語前據
貴慶奏江廣軍船每船帶蘆鹽四十包并未降旨准
行何以通幫遽行知曉公然私自攜帶著陶澍恩銘

秉公確切查明覆奏應如何妥行設法相機辦理固
不可任蘆鹽占礙淮綱尤不可令幫丁滋事致誤新
漕兌運欽此伏查歷來軍船帶私無不以搜查延誤
新漕爲辭以致爲害綱鹽莫敢誰何疊奉

諭旨嚴查復經臣奏明如敢藉詞挾制或棄船星散卽
飭丁另雇水手駕船歸次一面嚴拏究辦并將幫
弁參懲現奉

硃批所奏是實力行之欽此該弁丁等咸知凜遵並經
新署漕臣恩銘到任號令嚴明各幫所帶私鹽未
經入境多自行賣去不敢滿載道將委員等亦均

能嚴密按查持以鎮靜現在渡黃未灌塘僅止三百餘船刻日全竣正不必反覆示懦轉致延捱滋事若如該御史所奏游丁水手與風客販私有別慮其按查時貲本均歸烏有且慮臣執法過猛不足以折服幫丁之心是未知私鹽本無可折服而亦不盡出於幫丁臣查風客出本營私豈肯露面幫丁舵水爲之護符今按起私鹽所謂借貸之貲者卽借貸風客之貲也所謂全虧貲本者卽全虧風客之本也欲拏風客嚴辦而又慮虧其本乎鹽爲官物非他貨可比在平民且不能縱任販私而

况糧船水手律有專條比平民更嚴何得謂旂丁
水手販私與風販究有區別乎至其滿載私鹽照
例已應軍流今祇撻起其鹽趲行而過是正因漕
務而濟之以寬似不得謂爲一味以猛竊以水弱
民玩該御史所謂非徒無益而又害之者正在於
此卽如漕船帶私未始非前途玩縱之所致今若
因查鹽而慮其鉅險另啟弊端則盜賊豈無饑寒
之可憫梟徒亦有拒捕之堪虞又將何以折服之
伏思我

國家整綱飭紀法立知恩敢有玩法之人自有懲玩

之法前此嘉興幫船水手滋事經蘇省拏獲一百數十人解浙嚴辦前鑑具在并不因查鹽而始有滋事之徒不必因滋事而預作縱奸之想萬一有犯亦惟隨事懲創足資儆戒至江廣船雖衆實多守法卽如江蘇幫船勒索幫規動輒盈千累萬而江廣船尙無此風其情形較苦兩年來接查私鹽并無顆粒夾帶前漕臣吳邦慶曾將首先教戒水手不令帶私之湖北頭幫旂丁馬姓獎以花紅臣於龍江關覆查時并經每船酌加獎賞本年覆查如無夾帶擬仍照前給獎現在署漕臣恩銘押尾

已抵楊莊俟面晤時再行妥商籌議辦理合先附
片覆陳仰慰

宸廑謹

奏

道光十三年十一月二十八日奉到

硃批知道了欽此

會同浙閩督撫暨蘇撫籌議堵截淮私章程以衛

浙鹽摺子

奏爲籌議章程嚴堵淮私以衛浙鹽遵

旨覆

奏仰祈

聖鑒事竊照道光十二年五月十三日欽奉

上諭給事中邵正笏奏兩淮船板等船私鹽侵害浙鹺
請飭妥議章程協力堵緝一摺據稱江省常州鎮江
等府毘連大江爲浙西引鹽門戶順治年間於京口
地方設立官廳盤驗鹽船嚴拏夾帶私鹽立法至善

乃日久視爲具文兵役得規故縱以致浙西引地細
銷兼之上年江省奏開沿江孟瀆德勝澡港三河便
於舟楫往來卽有江北梟徒駕駛棚板黑魚腮等船
裝載私鹽絡繹進口更有地方棍徒勾引招接私設
秤手行家到處販賣一遇官役查拏冒稱災民肆行
強橫反向官鹽商鋪索詐搶奪因此商無轉輸店多
閉歇始於常鎮兩府蔓延蘇州松江太倉各屬浙西
引地自上年七月以來缺銷十餘萬引緡課數十餘
萬兩且三河對峙淮鹽呂四等場梟販片帆飛渡尤
爲便捷請飭江浙文武大員會同核議等語著陶澍

程祖洛林則徐富呢揚阿悉心妥議或照京口盤艚之例在於沿江隘口移駐一二員弁專司盤驗或於三河之中酌擇一河通行舟楫其餘二河以及支港概釘木柵不准通舟或修閘座派委委員司其啟閉以資捍禦此外如鎮屬丹徒各口濱臨大江淮私直達亦著籌畫堵截章程具奏又據稱常鎮二府鹽行浙省地屬江南與松所事同一律必須地方官協力巡查並著陶澍等督率員弁一體認真緝私如有稍分畛域膜視浙鹺准浙江巡撫據實參奏將該上司一併議處至淮揚漏私營弁有故縱情弊尤須嚴加

考核其浙省亦毋許藉詞諉卸停運懈巡總期於鹽務大有裨益欽此卽經_臣等劄飭江蘇臬司暨淮浙運司常鎮道等欽遵會核嚴查協力堵緝並督同常鎮二府查明孟瀆等三河對峙呂四等場扼要地方及丹徒臨江各處隘口偷漏情形應如何專委移駐及修理閘座委司啟閉或分別釘椿設卡俾資捍禦議立考核章程詳覆並由浙省飭委台州通判王世履候補運判蔣恩銘前詣常鎮二府會同各縣周歷查勘去後茲據該司道督同府縣等查議詳請具

奏前來臣等查常州府屬之孟瀆德勝澡港三河俱坐落郡城西北南通運河北達大江沿江口門澡港河爲圩塘港德勝河爲魏村港孟瀆河有二口一爲小河口一爲新開之超瓢港該三河江北對峙係泰興縣管轄由泰興東下爲靖江縣再下爲如臯通州通州以下始爲呂四等場地面相距在三百餘里之外三河口門雖不與呂四等場對峙而北岸之防範稍疎淮私卽不難渡江侵越自應籌議堵緝以絕私源惟三河開挑民間借

帑至二十萬之多均須攤徵歸款原爲通潮灌田世

蒙其利若各江口概議釘堵則潮來阻滯淤不旋踵工力歸於虛擲民情斷難甘服况各河均於運道大有關繫德勝河則輔翊孟河以濟運而小河口在於孟河中腰必藉此口進潮孟河之水勢始能暢旺灌入運河直達荆溪宜興無錫金匱等處庶空重經行漕船可免淺阻之虞今再四籌議澡港河小且有龍興沙橫亘口門形勢紆曲潮來甚細該河之挑鄉民專爲灌溉田畝而設擬於圩塘港口門用橫石三條釘堵每石中間三尺俾潮汐可通以資灌溉而船不能行則江北之倒撐等船

無從載私以入其餘各口既難堵塞計惟建閘設卡之法派委員役啟閉稽查俾江潮藉閘爲宣蓄旱澇不致爲患而私鹽以閘卡爲藩籬堵緝亦可期得力於水利鹽政兩有裨益查開挑三河案內奏准建閘一座現經定議在小河口內馬橋地方建立其魏村舊有石閘可以修整完固應照舊歸於河工案內辦理新開之超瓢港口該處民人亦環請建閘惟籌款需時難以并舉應請在於超瓢港口內選擇要隘處所設立卡房派撥兵役巡緝該處相距孟河營數里并令該都司不時就近查察

是該三河雖有四口而一口堵閉不准通舟兩口
建閘設卡以資捍禦其無閘之口內有孟河城阻
截守以都司今更於該口要隘之處議添卡房防
緝之法實已周備其運河內地該商等向設東西
河巡隨時偵緝應飭商多設巡船互相巡緝無庸
另議章程又查無錫金匱二縣錫界東南旣濱太
湖又與長洲吳縣相接私鹽山蘇湖兩府來者官
河小港隨處可通金界東北緊接江陰常熟西北
近連武進陽湖與武陽交界處所尙在腹裏惟江
陰常熟近鄰江海私販最多船板各船潑販侵銷

往來無定兩邑與江常兩縣毘連之村鎮如陳市
王莊羊尖嚴家橋張麻舍蠡國等處水陸交通實
無扼要之所且防之於腹裏不若防之於進口之
處更爲得力應飭福山營於各海口實力防堵又
查江陰縣境北濱臨大江計長一百四十里與江
北之泰興如皋通州海門崇明等場對峙中有壽
興龍登磨盤等沙均爲販私囤積之地壽興沙周
圍六十餘里有三沙汎把總一員外委一員駐劄
龍登磨盤兩沙向無營汎濱江一帶由西至東自
武進界連之桃花港起至常熟之界涇河止凡二

十港均通外江向釘椿木內有離城五里之黃田
港河身寬濶通達商賈舟楫向不釘椿離城三里
地方有上海稅房木卡一座稅房外里許有黃田
港汛千總一員外委一員駐劄惟該港雖有稅房
專查漏稅未能干預查鹽議請在汛地附近添設
卡棚一座照京口盤鹽之例責令該千總外委核
實查驗磨盤龍登兩沙議請移撥水師官弁一員
哨船兩號與壽興官弁互相巡哨又查宜興荆溪
二縣東至太湖境接蘇州湖州二府南屬山鄉毘
連浙界西達金壇溧陽二縣內多汊港支河四通

八達北與陽湖交界正北與武進毘連直達三河
孟瀆等港凡有淮私艚板等船皆由武進之三河
鎮江之越河等口潛入東北之鍾溪下邳烏溪三
處及百瀆大墟等港逼近太湖亦難保無私梟透
漏應於烏溪大墟總口添設卡木移營派弁堵巡
并飭商人添設巡船在於文瀆徐舍楊巷東西沈
及官村豐義等處與營巡互相梭緝盤拏又查靖
江縣僻處江北界連如皋泰興中隔界河內有夏
家石錠廟橋蔡家五港通達小船各港口均有城
守營汛弁駐劄巡查并於港口設有木柵保埠稽

查啟閉其餘支河小港歷經釘堵完固至江心劉
聞沙各港口係京口水師左營汛防向設外委一
員由商人召募巡快給發工食隨同弁兵巡緝防
範無虞私鹽侵越此籌議常州府屬孟瀆德勝淖
港三河及走私各隘口分別釘石建閘設卡堵截
淮私之情形也又查鎮江府屬之丹徒縣濱臨大
江西自高資港起東至丹陽交界之太平港止計
長一百四十餘里沙洲林立與淮揚對峙乃私鹽
出入咽喉之要地必於各隘口詳籌堵截庶幾淮
私不致侵越第由江入運其口有五一日京口卽

運河離京口二里有小閘又東有甘露閘又東二
十里爲丹徒口又東十里有諫壁口而京口設有
按鹽廳久經奏定鎮防廳會同鎮江營參將督率
兵役認真按查口內半里有西閘亦歸該廳管派
撥兵役督同閘夫啟閉稽查足資堵禦其小閘與
甘露閘兩處祇係蓄水濟運向釘木柵不通行舟
且俱派有兵役巡防已屬嚴密惟丹徒口內設有
橫閘諫壁口內設有越閘此二口非惟便民舟楫
凡遇乾旱京口淤塞回空糧艘亦由此入運實屬
通行要道而江北匪徒越境販私從此而入者亦

復不少若於口內擇要設卡稽查誠恐日久弊生
轉致有礙行旅詳加查核除京口暨小閘甘露閘
三處無庸添設外其橫越二閘內通運河外達大
江不特爲徒陽要隘更爲丹徒之丁冊帑地及壇
溧宜荆等縣并杭嘉二所之門戶必須嚴立巡防
堵其侵越該二閘設有閘官一員僅司啟閉向無
緝私之責查船隻抵閘須候啟放始行不能飛渡
尙易稽查惟閘官額設夫役有限稽察難周且設
遇玩法巨梟成羣闖閘又慮寡不敵衆應飭商人
在於兩閘口各添設巡役八名卽責成該閘官督

率稽查有鹽獲解無鹽放行不許留難其江面金山以西之世業等洲貼近儀徵所轄之老虎頸地方該處係兩淮江廣鹽船停泊之所以及傍梟聚圍私販出沒其間由土橋口直達沙洲一葦可渡又金山南岸緊對瓜洲大口私船片帆而下又焦山迤西之甘露港與江北金絲八港對峙迤東之丹徒諫壁二口口內雖有員弁稽查而口外接連御隆連城益課等十餘洲界連江都巡防尤宜嚴密以上四處應各設巡船一隻以資堵截又大港之外沙洲交錯對面卽係江北之三江口梟匪出

入靡常該處駐有安港司巡檢向設緝匪巡船卽責成該巡檢督同兵役兼緝又樂生洲至太平洲沙洲叢雜毘連丹陽泰興江都各洲梟徒夥販皆從江北而來須添設巡船又埤圩帑地自圖山韓橋起至朱張圩太平港止雖銷丹陽之引而在丹徒地界住賣應歸丹徒緝私其地緊靠大江樂生等洲是該處尤關緊要應於樂生永安等洲各添設巡船一隻以上除安港司本有巡船外共應添設巡船六隻由水師副將各就本汛每船派撥外委一員兵役八名各按段落無分畛域梭織巡防

彼此會哨庶聲勢得以聯絡設遇大夥私梟卽會
合兜擒方爲得力但江北各口不下數十處路路
皆可走漏若無場竈之售私梟棍何由而興販應
飭淮通泰揚各場員嚴禁竈漏并飭守口各員弁
實力查截禁止出口以杜私梟此丹徒及埤圩走
私各口應行駐弁稽查添設巡船之原委也又查
丹陽縣地當孔道水陸交衝空重糧艘差民船隻
夾帶繁多兼之支河汊港路路可通應請飭商添
設巡船互相堵緝其沿江隘口最要二處一係埤
圩帑地以南之包港河南通運河外達六沙等洲

爲淮私侵灌之地一與武陽連界之超瓢港爲崇
明岱山海私侵越之區均宜嚴立巡防以衛浙引
應於包港河口設立木卡一座該處有包港司巡
檢卽責成該員專司盤驗并飭由營添派外委一
員撥兵八名會同該巡檢督率認真稽查其超瓢
港係屬兩縣交界之區防範最易疎忽又太平港
錢家港口外之六沙張家洲及三墩子四墩子團
沙洲太平洲蔣家沙等處均係淮私由江北出口
至該處囤積興販實爲埤圩引地之害應於該處
添設巡船三隻每船由營派弁一員撥兵八名無

分畛域嚴密堵截此丹陽及埤圩各隘口必須設卡并添船巡緝之情形也又查金匱溧陽二縣地居偏僻支河汊港接連淮界通達太湖向有淮梟私販侵擾更有淮場船邊竈泥船裝運販賣假以易換密竹等物爲名本地鄉民私煎售賣暗借官銷兼有上年媚私倂匪冒災販私四處橫擾原設巡役寡不敵衆以致引鹽壅滯應飭商人多設巡船添雇巡役會同地方文武兵役在於金壇縣之荊城港清培河等處并溧陽縣之陽巷甓橋等處走私各隘口互相巡緝方可期私販無從偷渡此

壇漂二縣應飭商人添船協巡堵緝之情形也總
之私梟之靖全在巡緝之嚴現在飭勘釘堵建開
添設營巡極為周密究恐日久懈弛必須事關切
已之商巡與營巡互相稽察聲勢方臻聯絡庶梟
匪可期斂戢惟弁兵之勤惰自應明定賞罰方足
以收實效容_臣等飭令該司道等妥議功過章程
詳請咨部查照又查京口右營守備移駐韓橋地
方帶兵巡防向於運庫給發鹽菜銀四百四十兩
今沙洲疊漲私鹽盤踞現在四路設巡此處亦應
改設巡船一隻飭派弁兵在於該處梭織巡緝以

資周密應將前發鹽菜銀兩掣銷改作添船設卡
薪水之用其不敷之數仍於浙省運庫籌款給發
如此一轉移間庶兵歸實用費不虛糜再查積慣
巨梟悉皆兇悍之徒一遇兵役接拏動輒持械拒
捕若非攜帶鳥槍實不足以資堵禦而壯聲勢所
有常鎮二屬巡江兵役應仿照江西省道光四年
奏准成案酌帶鳥槍倘遇大夥私梟數在十人以上
持械逞兇拒捕力難擒獲准其施放鳥槍抵禦登
時格殺者照罪人持仗拒捕登時格殺律勿論如
係零星小販並無拒捕情形仍不准擅用違者照

例治罪蓋火槍利器原不容輕率妄用而大江禦
暴又不得不藉以抵格然必先期徧貼告示曉諭
使兵民咸知敬畏其兵役所用烏槍應照例編列
字號官爲給發以便稽查而昭慎重至於窩頓秤
手應飭各縣申明康熙五十五年讎志載明責成
保甲里民互相稽察有能拏獲照律給賞容隱徇
縱者照例治罪如此釘堵設卡設巡嚴拏暗訪俾
淮私堵絕而漸引自可暢銷以仰副

聖主整飭鹺務之至意所有^臣等籌議章程緣由理合
會同恭摺

奏伏乞

皇上聖鑒訓示謹

奏

道光十三年十二月初四日奉到

硃批依議認真辦理欽此

仍請停止加帶已庚殘引摺子

奏爲加帶已庚殘鹽實占各綱正額以致引課俱形積壓再行據實

奏請停止仰祈

聖鑒事竊

臣

前因已庚殘鹽自辛卯加帶以來江廣各

省連年被水各綱正額均未銷足核計壬辰未運楚西綱鹽尙有七十餘萬引之多未便仍令加帶僅完殘引之正課占礙正綱之錢糧兼致京外額解各雜款無以應解

奏請自癸巳綱起卽將已庚殘引停止加帶所有商

鹽每包五百斤出場除捆正鹽四百斤之外其餘
一百斤循照成例配割本綱正引全完正雜錢糧
奏奉

硃批戶部議奏欽此茲奉部議以兩淮從前鹽引滯銷
由於本重價昂自道光十年酌減科則成本已輕
十一年議定每引加鹽一百斤僅完正課三錢在
商人可以扯輕科則且以加斤之課彌補舊虧於
課項亦不無裨益今停止加帶已庚引課另行配
割正引按正雜錢糧全完計每四百斤須交課四
兩有零商人科則加重必致轉運不前且以五百

斤出場而欲以四百斤配引勢必暗中夾帶名爲另行割運實則照例捆包而已庚之加帶旣停課款卽歸無著應令詳加體察如果停止加帶另配正引實能較現完引課有盈無絀且能力杜奸商夾帶不致自弛防維方爲確有把握不得因江廣偶值偏災遂以鹽多壅滯爲詞遽將甫經奏定章程又思更變致滋弊混等因具

奏奉

旨依議欽此各行前來遵查

臣

前於道光十一年

奏請加帶已庚殘鹽原爲籌疏積引彌補舊虧每引

祇完正課亦以扯輕商本若果各岸均能將正帶引鹽按額銷足於

國課商運本皆有益乃自辛卯加帶以來江廣暨上下江各省連值水災於辛壬兩綱正額並未能銷足積壓壬辰綱鹽至七十萬餘引之多是有補舊之名而增積新之累在舊之所補祇正課之無多而新之所積實全款之甚重權衡全局實有萬難加帶之勢不敢以請帶在先自存迴護致誤機宜是以據實

奏明卽自癸巳綱起飭行停帶今部議恐科則驟增

且慮割引夾帶臣查加帶殘鹽祇完正項免納雜款原爲扯輕課本調劑商力起見但口岸未能行銷足額自不能偏顧商情增此輕課之帶引愈占正綱之地步且查辛卯壬辰兩綱雖各帶完已庚正課三十七八萬兩其本綱僅完八分亦各短缺三十餘萬之正課是加帶之與缺運其數僅足相抵而雜款無出積欠轉多各處待用紛紛咨催幾無虛日自不得不權其緩急暫停加帶現在癸巳業已開綱係照停止加帶計算科則正雜共四兩有零較從前仍屬輕減不致增累商運至從前加

三配割於出場斤重未能核實釐定運鹽到儀多由商人配報故有夾帶重斤之弊自

臣

奏明每引以五百斤出場捆四割一有整數而無畸零既省運腳尤便稽查由場所按包稱掣卽按斤割配絲毫不能影混卽係嚴防夾帶之把握此時以帶殘加斤改爲本綱之割配仍係按照舊章辦理不過以帶殘之引目換用本綱之引目於稽查核算一切并無更改商人無從弊混自不致又有夾帶之弊至弛防維據鹽運司俞德淵議詳前來

臣

再三籌酌不得不如此辦理以冀先儘正引徐

圖補救惟有據實覆陳仰懇

天恩俯念淮鹽課額甚重疊值災年行銷場蹶未能兼
補舊虧仍請自癸巳綱起將淮南已庚殘引停止
加帶循照

欽差奏定原案俟察看將來口岸暢銷後再行酌議加
帶辦理所有現運癸巳綱鹽除解捆正額四百斤
外餘鹽一百斤照案配割本綱正引完納正雜錢
糧至淮北票鹽行銷較暢其溢運之數仍作加帶
已庚銷算以補舊缺無庸停止合併聲明謹據實
恭摺具

奏伏乞

皇上聖鑒訓示謹

奏

道光十三年十二月十九日奉到

硃批戶部議奏欽此

查覆楚西現賣鹽價摺子

奏爲遵

旨查明楚西現賣鹽價恭摺覆

奏仰祈

聖鑒事竊

臣

承准軍機大臣字寄道光十三年十一月

初九日奉

上諭有人陳奏江西湖廣各州縣官鹽價昂每斤制錢六十文至七十餘文而私鹽每斤不過三十餘文民間扞法食私地方文武員弁任聽該商昂價漁利絕不禁止其爲得規庇縱無疑等語商人私擡鹽價本

干嚴禁近年一切陋規浮費概行裁革商本旣輕鹽價即可平減若如所奏官鹽價昂幾至私鹽一倍有餘私梟乘間而入勢必官引滯銷課款不能足額著陶澍等嚴飭各該地方文武員弁於新定章程實力奉行不得仍前收受商人陋規任聽昂價倘查有得規庇縱情弊卽行嚴參懲辦並著照現在銀價核定每鹽一包應值制錢若干通行曉諭不准踰越俾鹽價平減官引暢銷以期鹹務漸復舊規將此諭令知之欽此仰見

皇上整頓鹺綱因利除弊之至意

臣

伏思鹽利與米穀

並重均爲民生日用所必需其所以利於食私者皆因官鹽價貴之故是以欲振鹽綱莫如減價敵私一策而於江廣尤宜何以言之天下之鹽課或數萬十數萬多者數十萬止耳而淮鹽伯什倍之其數抵數省之地丁而有餘而行銷六省實則爲地無幾如江南之蘇松常鎮太倉徽廣例食浙鹽徐宿例食東鹽淮揚逼近場竈食鹽甚少往往融銷楚岸皖北各屬與豫省毘連之處皆食淮北海州之鹽其課亦微其食淮南鹽者蘇省惟江寧一府皖省則沿江之安池寧太和椒而已是以積重

之勢全在湖廣江西而江西之廣信則食浙鹽贛
州南安寧都與湖南之郴州桂陽皆食粵鹽湖北
之施南食川鹽其餘多爲鄰私所侵灌如衡永寶
靖之於粵荆宜之於川襄郢之於潞皆全爲私占
不過虛存淮鹽名目所真食淮鹽者江西惟南昌
南康瑞臨饒九湖北惟武昌漢陽黃州沔陽湖南
惟長沙與岳常澧三屬通計不過十數郡而八九
百萬正雜之課出焉皆由江廣之民無分大小貧
富殫終年之力輸之於商以登諸運庫世徒知江
浙之民力困於漕能見之能言之而不知江廣之

民力罄於鹽人不之見而亦無有言之者也昔唐

臣劉晏權天下之鹽始終其事十有八年始得六

百萬串今江廣十數郡之歲課實更過之非由鹽價昂貴奚以致是然課不能減卽鹽價無由而賤欲平鹽價亦惟有除陋規節冗費稍省商運之成本而後可前經

欽差

臣

王鼎寶興會同

臣

刪革一切成本稍輕卽經

臣

查照從前部定價值酌減二成計湖廣鹽每包八斤四兩江西每包七斤四兩均各定以每包抵岸售價二錢六分五釐梁鹽加售一分安鹽減售一

分嗣經運司以腳價一切無不增昂詳請

奏明酌增一二分由鹽道隨時議報統計每斤價值三分有零按照時價不過四十餘文仍較部價有減無增至於各處鹽價有昂至六七十文者較私鹽不啻加倍此則水販與店鋪所爲非商人所得而預也凡商人運鹽赴楚至漢口而止赴江西至南昌而止卽照所定之價發於水販分運各府州縣由城鄉各店鋪輾轉售賣其價卽與商人無涉

湖查乾隆五十三年經前大學士公阿桂等定議試行鹽價至嘉慶六年始定以湖廣每包價三錢

九釐零江西每包價二錢八分二釐零梁鹽每斤
加售二釐迨嘉慶十三年因河工報効加增一分
五釐二十三年

奏請停止道光六年又因軍需河工加價三釐九年
十二月奉

諭旨停止至於水販轉運向例每包准加銀五釐鋪戶
零售准加銀九釐其水陸遠近按程計里加增火
工運腳由地方官隨時酌核載在鹽法志大約湖
廣應加運腳每包自一釐八毫至六分四毫不等
江西自二釐至一分四釐不等亦經各督撫咨報

有案自道光十一年_臣等查照部價酌減二成之

後其時輪規既散隨到隨銷無能把持間值天時

人事之不齊偶有增長爲數甚微過時仍卽復原

現查湖廣鹽價眞梁每包二錢九分每斤合制錢

四十七八文頂梁白梁以次遞減江西銷市更滯

賣價更減尙非騰貴至於地方文武包庇增價最

爲惡習_臣查阿桂等前議試價摺內卽言淮鹽費

多利薄辦運不前皆因江西湖廣會有奏定之價

時或不能相符人人得以持其長短遂不免私出

陋規陋規既興有增無減卽有時成本稍輕原可

照價出售亦以費重不能復舊會奉

特旨禁革自可無需索之事然弊根不去商情尙多顧慮未肯踴躍等語可見人情不甚相遠不但縱商擡價足以得規卽無端勒商減價亦無非爲規費地位臣愚以爲但能堅持散輸之議無從居奇卽無能擡價小有起跌在一二分內者已較部價爲輕自可聽其自然無庸另議以免紛擾致滋觀望惟本年場埔被水淹漫秋冬之交更加雨雪連縣竈戶不能煎熬向來每引場價不過三兩今已長至五兩內外蕩草蒲包亦因歉收長價運本增重商

情竭蹶屢次援案請復從前部價均經臣與運司
剴切駁斥然場竈如此艱難轉運益形拮据察看
商情實不免支持喫力惟有咨明湖廣江西各督
撫嚴飭地方文武認真緝私以期銷路通暢藉資
利運稍回元氣至於水販鋪戶其售賣價值有無
增添例由湖廣江西督撫按照地方道里情形酌
核辦理亦卽移咨轉飭各州縣照例核辦毋許私
任加增倘有文武庇商擡價抑或勒捐需索一經
查出立卽嚴參懲辦一面飭令運司催商趕運不
得以歉產本重希冀增價并飭各鹽道設法疏銷

外所有查議淮鹽售價緣由理合恭摺覆

奏伏乞

皇上聖鑒謹

奏

道光十四年正月十三日奉到

硃批知道了欽此

陶文毅公全集

卷十五

奏疏

聖

覆奏准鹽奏銷難復原限摺子

奏爲接准部咨確查淮鹽奏銷甫望轉機尙難驟復
原限各情形據實陳明仰祈

聖鑒事頃准戶部咨大學士長齡等會議御史那斯洪
阿條奏

國用事宜一摺內開兩淮例於次年二月奏銷現在
展至六月應令該督確切查明應如何復歸原限
挽正綱分之處自行

奏明請

旨辦理等因奉

旨依議欽此遵卽飭行運司確查議詳去後茲據兩淮
鹽運使俞德淵詳稱遵查兩淮鹽課例於次年二
月奏銷除淮北改行稟鹽

奏明按年截數另案造報外所有淮南運務自道光
十一年三月開辦辛卯綱時各岸尙存厯綱殘鹽
四十餘萬引而在淮已請未運殘鹽又有三十餘
萬之多是辛卯一年額引已爲殘鹽先占運銷地
步是以十二年二月例應奏銷時不得不詳請

奏展半年乃奉部議祇准四箇月以致課雖完納八
分引鹽實多積壓且辛卯旣被占於殘鹽故壬辰

卽被占於辛卯層遞而下後積無非前壅兼以加帶已庚殘引七十餘萬亦係正綱外增之數如果各省年穀順成岸銷暢旺則流通由漸尙可導滯疏新詎自十一年來江廣疊遭水患民食維艱鹽尤所緩雖比之從前銷數尙爲稍增然總未能足額此各岸滯銷之實在情形也乃場竈更有缺產查場竈均在下河濱海之區水潦所歸上年西水下注時正值海潮頂託垣鹽被浸多有消耗秋冬雨雪更甚場竈全淹竈丁無計攤淋滴味發淡熬不成鹽加以蕩草蘆柴人工飯食無一不費以致

場價頓昂運本愈重計自上年壬辰奏銷後雖已開辦癸巳新綱而商人投請納課守候未運之壬辰綱鹽截至今春尙有七十餘萬引貴本占閤卽無力以納癸巳課銀况場竈因雨雪停煎已久甫經攤熬現亦無鹽可運此蓋限於天時實非督催稍敢鬆勁以目前情形而論恐須再有加緩難以遽復原限詳請具

奏前來

臣

伏查兩淮疲敝久在

聖明洞鑒之中前此辛巳壬午癸未三綱係減半折行丙戌銚半丁亥全銚已丑則停運三分庚寅復又

全停通計五綱約該徵正課銀一千萬兩而此一
千萬數內尙有淮北借馬未完及預納歲支占墊
銀兩並未按數完解臣於萬難措手之際受任兼
管仰稟

宸謨兢兢釐剔督率運司循照

欽差會議章程裁浮費以舒商力慎出納以重庫儲散
輪規以廣售銷定額斤以杜夾帶加以堵截糧私
嚴拏梟匪清理鄰界禁捏淹消諸凡遵

旨實力奉行倍加整頓罔敢疎懈是以辛卯壬辰癸巳
三年以來業已奏銷兩綱錢糧癸巳現亦開綱起

辦較前十綱中祇辦五綱有餘之引課爲數似屬
不侔且已奏銷兩綱引內不惟正款全行撥解並
另有多徵之已庚正課八十餘萬更有淮北久無
徵課之引亦於改票引內徵完銀七十餘萬兩計
此多徵之銀足抵淮綱正課之八似已畧有成效
可望轉機惟因辛卯開綱時在岸及已請未運各
鹽幾及一綱占礙辛卯銷數催徵催運早棘手於
接辦之初是以辛卯奏銷不得不

奏明展限而部限四箇月實不足以疏前積層累而
下勢有相因商人止此一副貲本力難課納兩綱

况值江廣水患頻仍場竈連年被澇多有淹消更
兼缺產目前幾至無鹽可運與浙江情形相似實
屬人力難施現在江西口岸需鹽尤緊刻須籌濟
所幸春令暄和趕緊疏銷積水修復埕池如能天
氣久晴趕煎趕運再得岸銷加暢回課源源則至
六月展限奏銷時自當按照徵完分數據實造報
斷不敢稍事遲延萬一仍有不齊產歉銷滯亦惟
臨期據實籲請

恩施

臣

萬不敢以目前實在情形率議歸復原限自蹈
欺飾之咎惟有得尺得寸隨事隨時殫竭血誠不

敢稍有鬆勁以期將來全復舊規仰副

聖主整頓淮綱之至意所有接准部咨查明淮鹺奏銷
情形謹據實縷陳具

奏伏乞

皇上聖鑒謹

奏

道光十四年三月初九日奉到

硃批戶部知道欽此

浙江借買淮北票鹽一萬引附片

再臣接准浙江撫臣富呢揚阿咨該省亦因上年雨水缺鹽已向長蘆借買緩不濟急現復

奏請借買淮北票鹽一萬引運赴嘉所之長洲元和吳縣充用並鈔摺咨會前來臣查淮北自改行票鹽以來口岸暢銷所產鹽斤亦只可自備本岸行銷之用惟嘉所長洲等縣地廣人稠缺鹽甚急臣又何敢稍存岐視致民間有淡食之虞且浙引攸關

國課亦萬不敢不代籌接濟當卽飭行兩淮運司及

海州運判查明票販在途尙未過湖之鹽實有若干按照浙引斤重酌撥一萬引之數俾資濟急第淮鹽亦正在缺產茲於無可籌備中通融接濟亦祇可借買萬引倘多有加增卽恐顧彼失此難以爲繼計現在天氣晴和浙省熬鹽諒可逐漸暢旺合併附片陳明伏乞

聖鑒謹

奏

道光十四年三月二十九日奉到

硃批知道了欽此

停借淮北商人底馬摺子

奏爲停止淮北鹽商借馬以重課款仰祈

聖鑒事竊照兩淮掣鹽以二十引爲一馬各商按馬納課然後掣鹽發運謂之底馬錢糧乾隆年間北商因運艱課重懇先完一半錢糧給發底馬掣運限六箇月繳清課項謂之借馬迨嘉慶年間因積欠底馬銀兩較多經前鹽政臣延豐

奏請停止道光七年前任兩江總督臣琦善前任兩淮鹽政臣張青選於

奏覆查明淮鹺積重情形案內欽奉

上諭淮北商人積疲已久復因連年運道梗阻虧折課
運著准照從前借馬成案一律借給底馬自請程之
日起限六箇月完繳轆轤借給等因欽此欽遵在案
詎自借馬以來各商無不紛紛請照辦理前馬未
還後借又多課款幾同虛設並且借藩籬爲名動
需淮南調劑日累日甚課細商逃近年改行票鹽
章程易商爲販課項有增無缺計河北及湖運四
十二州縣現已全改票販祇有江運八岸及天長
一縣留歸商辦各商疲乏已久運鹽無幾若仍借
給底馬必致延欠難歸應將淮北借馬之案停止

仍按舊例先納課後運鹽以歸核實至淮南鹺務
重大運岸太遙偶值轉運不靈萬不得已之時酌
量緩納提課歸款係屬暫時設法疏通以速商運
並非常有之事且旋即委員赴岸守提於課款無
虧不在此例合併聲明據鹽運使俞德淵詳請具
奏前來除批飭照辦外所有停止淮北借馬緣由謹
繕摺陳明伏乞

皇上聖鑒謹

奏

道光十四年三月二十九日奉到

硃批戶部知道欽此

趕辦王癸未運引數緩開甲午新引附片

再臣前接戶部咨大學士長齡等會議御史那斯

洪阿條奏

國用事宜一摺內開兩淮例於次年二月奏銷現在
展至六月應令該督確切查明應如何復歸原限
挽正綱分之處自行奏明請

旨辦理等因奉

旨依議欽此當經

臣

查明辛卯銷數被占於殘鹽壬辰

之鹽卽被占於辛卯商人祇此一副貲本力難課
納兩綱加以江廣水患頻仍場竈連年被澇淌消

缺產幾至無鹽可運現在疏銷積水修復埕池如
能天氣久晴趕前趕運再得岸銷加暢回課源源
則至六月展限

奏銷時自當按照徵完分數據實造報萬一仍有不
齊亦惟臨期籲請

恩施奏奉

硃批戶部知道欽此遵卽飭行鹽運司嚴催各商趕緊
完課請運去後無如各商因產絀銷滯壬辰綱已
納課未請運之鹽爲數甚鉅占閤貲本力難再辦
癸巳課鹽當經運司將癸巳綱引按照壬辰各商

實運引數逐一分派勒限比催茲截至本年六月
底止已將入

奏正雜課銀完納八分三釐催據遵限分別造報前
來除照例核

題外查向來前綱引課造報後卽應開辦下綱今癸
巳綱

奏銷錢糧雖經催商勉力輸完而核計壬辰綱食引
鹽已投請納課守候未運者截至夏季止尙有四
十餘萬引又癸巳綱已納課有未運鹽九十餘萬
引加以未納課之一分七釐計鹽二十餘萬引統

計積壓未運一綱有餘若將甲午綱引接續開辦不但商力未能且查淮南各場自去冬雨雪風潮連綿浸漬以來竈鹽缺產異常爲從來未見未聞之事現雖煎熬稍旺亦斷不能以一年之所出供兩綱之額運卽各口岸頻年災歉民食維艱江廣近復被水其勢更難以加倍行銷臣與運司再三籌議目下民與商俱元氣未復若口岸積壓必致商本占閣後運難繼殊於大局攸關計惟有先行疏通前積再辦後鹽應將現在納課未運壬癸兩綱鹽一百四十餘萬引勒限各商於本年內先行

找完雜項儘力趕重趕運俟來年正月再行開辦
甲午新綱俾各商得於半年之中專力捆運壬癸
積鹽赴岸售出價銀收回納課領運以利轉輸則
來年請辦甲午新引自可踴躍且舊鹽旣已運清
卽或新綱

奏限迫屆而設法催完亦易爲力如此新舊分限辦
理商力藉以稍紓

國課仍無貽誤於運務實有裨益據鹽運使俞德淵
詳請附

奏前來除批飭趕緊辦理外理合附片陳明伏乞

聖鑒訓示謹

奏

道光十四年八月十八日奉到

硃批戶部議奏欽此

陳明淮北鹽少販多情形附片

再臣路過揚州查閱運司庫儲現尙存銀二百數十萬稍可支持正款急需之用惟商課已納而鹽多未運卽不免占閣後綱地位皆因鹽場細產之故催煎不得不緊幸連日得有甘雨潮氣上升當可漸臻充裕至淮北票鹽現在納課者已有四十餘萬而產鹽僅止二十餘萬計溢額已十數萬必須截歸下綱始得有鹽發給此則非曬掃之不力實由票販之過於踴躍爭先也限於一隅之地票鹽有數而票販無數無可爲力不能滿票販之願

卽難免票販之怨亦無可爲力然海州有鹽卽售
窮黎獲濟皖豫之民鹽價減而無淡食之憂且
國課較增視從前片引不行其暢滯迴殊似票鹽之
法尙可藉資補劑臣惟有整頓章程俾巡緝不稍
鬆勁俟年底統核全局卽可籌議定則也謹附片
縷陳伏乞

聖鑒謹

奏

道光十四年十月初九日奉到

硃批知道了留心妥辦欽此